

## ԻՐԱՎԱԿԱՆ ՎԵՐԼՈՒԾՈՒԹՅՈՒՆ

### ՀՀ ՆԳՆ Ոստիկանության պարեկային ծառայողի կողմից կազմված վարչական իրավախախտման վերաբերյալ արձանագրության ապացուցողական նշանակության վերաբերյալ

Սույն վերլուծությունն իրականացվել է «Ա.Դ.Սախարովի անվան մարդու իրավունքների պաշտպանության հայկական կենտրոն» հասարակական կազմակերպության (այսուհետ՝ Կազմակերպություն) դիմումատուներից մեկի ներկայացրած խնդրի հիման վրա, որը վերաբերում է ՀՀ ՆԳՆ Ոստիկանության պարեկային ծառայության աշխատակցի կողմից, առանց համապատասխան տեխնիկական միջոցներով ձեռք բերված ապացույցների, իր իսկ կազմած արձանագրության հիման վրա անձին վարչական պատասխանատվության ենթարկելու իրավաչափությանը:

Տվյալ դեպքում Պարեկային ծառայողը ճանապարհային երթևեկության կանոնների խախտման կասկածանքով կանգնեցրած տրանսպորտային միջոցի վարորդի նկատմամբ, առանց հիմնավորման վարչական իրավախախտման վերաբերյալ արձանագրություն է կազմել, և Վարչական իրավախախտումների վերաբերյալ ՀՀ օրենսգրքի 124-րդ հոդվածի 11-րդ կետի հատկանիշներով կայացրել է միջամտող վարչական ակտ:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 11-րդ կետը վերաբերում է այն դեպքերին, երբ տրանսպորտային միջոցի վարորդը թեկուզ մեկ ձեռքի օգտագործմամբ ընթացքի ժամանակ օգտվում է ռադիոկապից և (կամ) հեռախոսակապից: Սակայն, տվյալ գործով առկա չէ ճանապարհային երթևեկության բնագավառի իրավախախտումների հայտնաբերման և ամրագրման համար ոստիկանությանը հատկացված ՀՀ Կառավարության 32.11.2006թ. թիվ 1769-Ն որոշմամբ նախատեսված տեխնիկական միջոցներով ձեռք բերված և դրա թույլատրելիության բոլոր չափանիշներին համապատասխանող որևէ ապացույց, որով կարող էր հիմնավորվել վարորդին վերագրվող իրավախախտումը կատարած լինելու փաստը:

Նշված իրավիճակում խնդրահարույց հանգամանքը ոչ այնքան ճանապարհային երթևեկությունը կարգավորող պարեկային ծառայողի անհիմնա վարչարարությունն է, որքան որ վարչական ակտի վերադասություն կարգով բողոքարկման արդյունքում ՀՀ Պարեկային ծառայության պետի անունից տրված օրենքի մեկնաբանությունը:

Մասնավորապես, ՀՀ Պարեկային ծառայության պետի պարզաբանմամբ՝ *օրենսդիրը ոստիկանության ծառայողին իրավախախտումը հայտնաբերելու, արձանագրություն կազմելու և որոշում կայացնելու լիազորություն տալով՝ որպես պարտադիր պայման չի նշում իրավախախտման փաստարկման համար տեխնիկական սարքի կիրառումը:*

Սակայն մեր կարծիքով օրենքի այսպիսի մեկնաբանությամբ վարորդի նկատմամբ միջամտող վարչական ակտ կայացնելը խախտում է ՀՀ օրենսդրությամբ սահմանված՝ անձի իրավունքների պաշտպանության երաշխիքները հետևյալ հիմնավորմամբ.

**ՀՀ Սահմանադրության 39-րդ հոդվածի համաձայն՝** *մարդն ազատ է անելու այն ամենը, ինչը չի խախտում այլոց իրավունքները և չի հակասում Սահմանադրությանը և օրենքներին: Ոչ ոք չի կարող կրել պարտականություններ, որոնք սահմանված չեն օրենքով:*

**ՀՀ Սահմանադրության 6-րդ հոդվածի 1-ի մասի համաձայն՝** *(...) պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով:*

**«ՀՀ վարչական դատավարության օրենսգրքի» 3-րդ հոդվածի համաձայն՝ յուրաքանչյուր ֆիզիկական կամ իրավաբանական անձ սույն օրենսգրքով սահմանված կարգով իրավունք ունի դիմելու վարչական դատարան, եթե համարում է, որ պետական (...) մարմնի կամ դրա պաշտոնատար անձի վարչական ակտով, գործողությամբ կամ անգործությամբ՝**

1) խախտվել են կամ անմիջականորեն կարող են խախտվել նրա՝ Հայաստանի Հանրապետության Սահմանադրությամբ, միջազգային պայմանագրերով, օրենքներով կամ այլ իրավական ակտերով ամրագրված իրավունքները և ազատությունները (...),

2) նրա վրա ոչ իրավաչափորեն դրվել է որևէ պարտականություն.

3) նա վարչական կարգով ոչ իրավաչափորեն ենթարկվել է վարչական պատասխանատվության:

**«Վարչարարության հիմունքների և վարչական վարույթի մասին» ՀՀ օրենքի 10-րդ հոդվածի համաձայն՝** վարչական մարմնի կողմից քննարկվող փաստական հանգամանքների վերաբերյալ անձի ներկայացրած տվյալները, տեղեկությունները համարվում են հավաստի բոլոր դեպքերում, քանի դեռ վարչական մարմինը հակառակը չի ապացուցել: Արգելվում է անձանցից պահանջել իրենց ներկայացրած տվյալները, տեղեկությունները հավաստող փաստաթղթեր կամ լրացուցիչ տեղեկություններ, եթե այդ պահանջը սահմանված չէ օրենքով: Եթե վարչական մարմինը հիմնավոր կասկածներ ունի անձանց ներկայացրած տվյալների, տեղեկությունների իսկության վերաբերյալ, ապա ինքը պարտավոր է ինքնուրույն և իր հաշվին ձեռնարկել միջոցներ՝ դրանց իսկության մեջ հավաստիանալու համար:

**«Վարչարարության հիմունքների և վարչական վարույթի մասին» ՀՀ օրենքի 37-րդ հոդվածի համաձայն՝** վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

**«Վարչարարության հիմունքների և վարչական վարույթի մասին» ՀՀ օրենքի 43-րդ հոդվածի 1-ին մասի «բ» կետի համաձայն՝** անձի և վարչական մարմնի փոխհարաբերություններում ապացուցման պարտականությունը կրում է՝ վարչական մարմինը՝ անձի համար ոչ բարենպաստ փաստական հանգամանքների առկայության դեպքում:

**ՀՀ վարչական դատավարության օրենսգրքի 29-րդ հոդվածի 2-րդ մասի 1-ին կետի համաձայն՝** վիճարկման հայցով ապացուցման բեռը կրում է վարչական մարմինը, որն ընդունել է միջամտող վարչական ակտը՝ դրա համար հիմք ծառայած փաստերի մասով (...):

**Նույն օրենսգրքի 29-րդ հոդվածի 1-ին մասի համաձայն՝** եթե բոլոր ապացույցները հետազոտելուց հետո գործի էլքը պայմանավորող որևէ փաստ մնում է չապացուցված, ապա դրա բացասական հետևանքները կրում է այդ փաստի ապացուցման բեռը կրող կողմը:

Վերոգրյալից հետևում է, որ վարչական մարմինը վարչական իրավախախտման վերաբերյալ գործը քննելիս պարտավոր է հետազոտել բոլոր ապացույցները և որոշում կայացնել բացառապես ապացույցների հիման վրա: Ընդ որում, վարչական մարմնի կողմից քննարկվող փաստական հանգամանքների վերաբերյալ անձի ներկայացրած տվյալները և տեղեկությունները համարվում են հավաստի բոլոր դեպքերում, քանի դեռ վարչական մարմինը հակառակը չի ապացուցել:

Միևնույն ժամանակ, անձի համար ոչ բարենպաստ փաստական հանգամանքների, այդ թվում՝ վարչական իրավախախտման դեպքի առկայության ապացուցման բեռը վարչական վարույթի փուլից սկսած, ընդհուպ մինչև դատական պաշտպանության փուլը ներառյալ, կրում

է վարչական մարմինը, ով և նշված պարտականությունը պատշաճ չիրականացնելու և ապացույցները հետազոտելուց հետո գործի ելքը պայմանավորող որևէ փաստ չապացուցված մնալու դեպքում՝ կրում է նշվածի բացասական հետևանքները:

**Քննարկվող գործով Պարեկային ծառայողի կողմից կազմվել է վարչական իրավախախտման վերաբերյալ արձանագրություն, որը սակայն, ինքնին չի կարող բավարար համարվել վարչական իրավախախտման փաստը հաստատված համարելու համար՝ հաշվի առնելով այն հանգամանքը, որ վեճի առարկա հանդիսացող որոշման վիճարկման հիմքում ընկած է հենց դրանում արձանագրված փաստերի վիճարկումը:**

Ուստի պետք է արձանագրել, որ միայն Պարեկային ծառայողի կողմից կազմված վարչական իրավախախտման վերաբերյալ արձանագրությամբ չի կարող հիմնավորվել անձի կողմից ձեռքի օգտագործմամբ ընթացքի ժամանակ հեռախոսակապից օգտվելու փաստը, հետևաբար «ՀՀ վարչական դատավարության օրենսգրքի» 29-րդ հոդվածի 1-ին մասի իմաստով՝ դրա բացասական հետևանքները պետք է կրի ՀՀ ՆԳՆ ոստիկանության պարեկային ծառայությունը՝ որպես վիճարկվող վարչական ակտի համար հիմք հանդիսացած փաստական հանգամանքների ապացուցման բեռը կրող կողմ:

Այլ խոսքով, նշված իրավիճակում անձին վերագրվող իրավախախտման վերաբերյալ փաստական հանգամանքը պետք է համարել չապացուցված, իսկ իրավահարաբերությունների ծագման պահին գործող խմբագրությամբ Վարչական իրավախախտումների վերաբերյալ ՀՀ օրենսգրքի 124-րդ հոդվածի 11-րդ մասով նախատեսված վարչական իրավախախտման դեպքը՝ բացակայող՝ զանցակազմի օբյեկտիվ կողմ հանդիսացող արարքն իմ կողմից կատարվելը ապացուցված չլինելու հիմքով:

Այդուհանդերձ, չապացուցված արարքն իր հերթին անձին վարչական պատասխանատվության ենթարկելը բացառող հանգամանք է, ուստի նման պայմաններում ընդունված վարչական ակտը հանդիսանում է ոչ իրավաչափ վարչարարության արդյունք և ենթակա է անվավեր ճանաչման:

**Հարկ է նկատել նաև, որ «Վարչական իրավախախտումների վերաբերյալ» ՀՀ օրենսգրքի 282-րդ հոդվածի համաձայն՝ *քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝***

*1) վարչական տույժ նշանակելու մասին.*

*2) գործի վարույթը կարճելու մասին:*

**Նույն օրենսգրքի 247-րդ հոդվածի 1-ին պարբերության 1-ին կետի համաձայն՝ *վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝ վարչական իրավախախտման դեպքի կամ կազմի բացակայությունը:***

Վերը մեջբերված իրավադրույթները վկայում են, որ դեռևս վարչական վարույթի փուլում Պարեկային ծառայությունը պետք է ընդունել վարչական իրավախախտումների վերաբերյալ ՀՀ օրենսգրքի 282-րդ հոդվածի 1-ին պարբերության 2-րդ կետով նախատեսված որոշումը՝ փոխկապակցված նույն օրենսգրքի 247-րդ հոդվածի 1-ին պարբերության 1-ին կետի հետ:

**«Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի համաձայն՝ *անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է՝***

*ա) օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով.*

*բ) կեղծ փաստաթղթերի կամ տեղեկությունների հիման վրա, կամ եթե ներկայացված փաստաթղթերից ակնհայտ է, որ ըստ էության պետք է ընդունվեր այլ որոշում (...):*

Այսպիսով, ամփոփելով վերոգրյալը գտնում ենք, որ համապատասխան տեխնիկական միջոցներով ձեռք բերված ապացույցների բացակայության պայմաններում, միայն Պարեկային ծառայողի կազմած արձանագրության հիման վրա անձի նկատմամբ միջամտող վարչական ակտ ընդունելը խախտում է օրենքի վերը վկայակոչված դրույթները և պետք է ամբողջությամբ անվավեր ճանաչվի ՀՀ վարչական դատարանի որոշմամբ:

**Նոյեմբեր 2025թ.**

**Կատարող, իրավաբան՝  
Նաիրա Ավետիսյան**

**«Ա.Դ.Սախարովի անվան մարդու իրավունքների պաշտպանության հայկական կենտրոն»  
հասարակական կազմակերպություն, Կենտրոնական գրասենյակ (Երևան)**